

Broj: 03-02-1522/2025
Sarajevo, 18.11.2025. godine

**PARLAMENT FEDERACIJE
BOSNE I HERCEGOVINE**

- Predstavnički dom -
gosp. Dragan Mioković, predsjedavajući
- Dom naroda -
gosp. Tomislav Martinović, predsjedavajući

Poštovani,

U skladu sa članom IV.B.3.7.c) (III) Ustava Federacije Bosne i Hercegovine, a u vezi sa članom 172. stav (1) Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i sa članom 164. stav (1) Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09, 24/20 i 60/24), radi razmatranja i usvajanja po skraćenom postupku, dostavljam Vam **PRIJEDLOG ZAKONA O IZMJENAMA I DOPUNAMA ZAKONA O KRIVIČNOM POSTUPKU FEDERACIJE BOSNE I HERCEGOVINE**, koji je utvrdila Vlada Federacije Bosne i Hercegovine na 61. sjednici, održanoj 17.11.2025. godine.

Prijedlog zakona se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,



PREMIJER

Nermin Nikšić

Prilog:

- Prijedlog zakona na bosanskom jeziku (CD)
- Odredbe Zakona koje se mijenjaju i dopunjuju
- Izjava o usklađenosti
- Obrazac broj 1a
- Obrazac broj 2
- Obrazac IFP-NE
- Zakon o krivičnom postupku Federacije Bosne i Hercegovine („Službene novine Federacije BiH“, br. 35/03, 37/03, 56/03, 78/04, 28/05, 55/06, 27/07, 53/07, 9/09, 12/10, 8/13, 59/14 i 74/20)

**Co: Federalno ministarstvo pravde
gosp. Vedran Škobić, ministar**

Co: pred-ct

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**ZAKON O IZMJENAMA I DOPUNAMA ZAKONA O KRIVIČNOM POSTUPKU
FEDERACIJE BOSNE I HERCEGOVINE**

Sarajevo, novembar 2025. godine

PRIJEDLOG ZA DONOŠENJE ZAKONA PO SKRAĆENOM POSTUPKU

Postupajući u smislu odredaba člana 26. Poslovnika o radu Vlade Federacije Bosne i Hercegovine - Prečišćeni tekst („Službene novine Federacije BiH“, br. 6/10, 37/10, 62/10 i 67/21) predlažemo donošenje Zakona o izmjenama i dopunama Zakona o krivičnom postupku Federacije Bosne i Hercegovine po skraćenom postupku. Imajući u vidu da se radi o manje složenom i obimnom zakonu, u konkretnom slučaju su ispunjeni uvjeti propisani članom 172. Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, br. 69/07, 2/08, 26/20 i 13/24) i 164. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09, 24/20 i 60/24) koje zakon mora zadovoljiti da bi bio razmatran po skraćenom postupku.

ZAKON O IZMJENAMA I DOPUNAMA ZAKONA O KRIVIČNOM POSTUPKU FEDERACIJE BOSNE I HERCEGOVINE

Član 1.

U Zakonu o krivičnom postupku Federacije Bosne i Hercegovine ("Službene novine Federacije BiH", br. 35/03, 37/03 – ispr., 56/03, 78/04, 28/05, 55/06, 27/07, 53/07, 9/09, 12/10, 8/13, 59/14 i 74/20), u članu 21. tačka g) riječi: "Državnu graničnu službu" zamjenjuju se riječima: "Graničnu policiju Bosne i Hercegovine".

Član 2.

U članu 53. stav (2) mijenja se i glasi:

"(2) Za branitelja se može uzeti advokat pod uvjetima koji su propisani zakonom."

Član 3.

U članu 57. stav (1) mijenja se i glasi:

"(1) Odluka o isključenju branitelja donosi se na posebnom saslušanju kome prisustvuju tužitelj, osumnjičeni, odnosno optuženi, branitelj i predstavnik advokatske komore čiji je branitelj član."

Član 4.

U članu 59. stav (4) mijenja se i glasi:

"(4) Ako osumnjičeni, odnosno optuženi, u slučajevima obavezne odbrane ne uzme sam branitelja, ili branitelja ne angažuju osobe iz člana 53. stav (3) ovog zakona, branitelja će postaviti predsjednik nadležnog suda ili osoba koju predsjednik suda u slučaju njegove spriječenosti ovlasti, abecednim redoslijedom sa liste branitelja koji do tada nije postavljen pred tim sudom. U ovom slučaju osumnjičeni, odnosno optuženi ima pravo na branitelja do pravomoćnosti presude, a ako je izrečena kazna dugotrajnog zatvora, i u postupku po pravnom lijeku."

Stav (6) mijenja se i glasi:

"(6) Federalni ministar pravde donijet će Pravilnik o načinu i postupku za postavljenje branitelja u roku od 30 dana od dana stupanja na snagu ovog zakona."

Član 5.

U članu 59a. stav (1) mijenja se i glasi:

"(1) Listu branitelja iz člana 59. stav (4) ovog zakona rješenjem utvrđuje federalni ministar pravde u saradnji sa Advokatskom/Odvjetničkom komorom Federacije Bosne i Hercegovine za postupke pred Vrhovnim sudom Federacije Bosne i Hercegovine i Federalnim tužilaštvom Federacije Bosne i Hercegovine, odnosno nadležni kantonalni ministar pravde u saradnji s nadležnom regionalnom advokatskom komorom za branitelje koji imaju sjedište na području tog kantona za

postupke pred općinskim i kantonalnim sudovima i kantonalnim tužilaštvima. Lista branitelja utvrđuje se abecednim redoslijedom po prezimenu branitelja i može se voditi i u elektronskom obliku.“

Član 6.

U članu 60. stav (2) mijenja se i glasi:

“(2) Zahtjev za postavljanje branitelja iz stava (1) ovog člana može se podnijeti u toku cijelog krivičnog postupka. Branitelja postavlja predsjednik nadležnog suda ili osoba koju predsjednik suda u slučaju njegove spriječenosti ovlasti abecednim redoslijedom sa liste branitelja iz člana 59. stav (4) ovog zakona.”

Član 7.

Iza člana 60. dodaje se novi član 60a. koji glasi:

“Član 60a.
(Obaveza izvještavanja)

Sudovi u Federaciji Bosne i Hercegovine dužni su Federalnom ministarstvu pravde i nadležnom kantonalnom ministarstvu pravde dostaviti godišnji izvještaj o postavljenim braniteljima iz čl. 59. i 60. ovog zakona, najkasnije do 31.03. za prethodnu godinu.”

Član 8.

Član 63. stav (4) mijenja se i glasi:

“(4) Predsjednik nadležnog suda ili osoba koju predsjednik suda u slučaju njegove spriječenosti ovlasti može na traženje osumnjičenog, odnosno optuženog ili uz njegovu saglasnost, razriješiti postavljenog branitelja koji neodgovorno vrši svoju dužnost. Umjesto razriješenog branitelja postaviti će se drugi branitelj. O razriješenju branitelja odmah će se obavijestiti advokatska komora čiji je član.”

Član 9.

Iza člana 456. dodaje se novi član 456a. koji glasi:

“Član 456a.
(Nadzor nad primjenom)

Nadzor nad primjenom odredbi člana 59. stav (4) i člana 60. stav (2) vrši Federalno ministarstvo pravde.”

Član 10.

Ovaj zakon stupa na snagu osmog dana od dana objavljivanja u „Službenim novinama Federacije BiH“.

OBRAZLOŽENJE PRIJEDLOGA ZAKONA O IZMJENAMA I DOPUNAMA ZAKONA O KRIVIČNOM POSTUPKU FEDERACIJE BOSNE I HERCEGOVINE

I – USTAVNI OSNOV

Ustavni osnov za donošenje ovog zakona sadržan je u odredbi člana IV. C. 3. a u vezi sa članom IV. A. 20. (1) d), Ustava Federacije Bosne i Hercegovine, kojim je propisano da će pravila postupka potrebna da bi se osigurala jednakost u postupanju kao i osnovni principi pravičnosti u postupcima pred sudovima i organizaciji svih sudova biti utvrđeni zakonima Federacije. Obzirom da se ovim zakonom uređuju pravila krivičnog postupka pred sudovima u Federaciji BiH navedena ustavna odredba predstavlja ustavni osnov za njegovo donošenje, pa je na osnovu člana IV. A. 20. (1) d) Ustava Federacije BiH, Parlament Federacije BiH nadležan za donošenje ovog zakona.

II – RAZLOZI ZA DONOŠENJE

Federalno ministarstvo pravde primilo je inicijativu članova Advokatske/Odvjetničke komore F BiH koja se odnosi na reformiranje sistema odbrana po službenoj dužnosti koji je uspostavljen u Federaciji Bosne i Hercegovine na osnovu Zakona o krivičnom postupku Federacije Bosne i Hercegovine ("Službene novine Federacije BiH", br. 35/03, 37/03 – ispr., 56/03, 78/04, 28/05, 55/06, 27/07, 53/07, 9/09, 12/10, 8/13, 59/14 i 74/20) (u daljnjem tekstu: ZKP FBiH), imajući u vidu nesrazmjer u broju dodijeljenih odbrana po službenoj dužnosti advokatima u krivičnim postupcima pred sudovima u Federaciji Bosne i Hercegovine.

Značajno je istaknuti da je sistem dodjele odbrana po službenoj dužnosti, što podrazumijeva procesne situacije u kojima osumnjičeni, odnosno optuženi, u skladu s odredbama ZKP FBiH mora imati branitelja ili situaciju u kojoj si isti ne može, uslijed slabog imovinskog stanja, priuštiti branitelja, predloženim Prijedlogom zakona o izmjenama i dopunama Zakona o krivičnom postupku Federacije Bosne i Hercegovine (u daljnjem tekstu: Prijedlog) koncipiran na transparentan način koji svim braniteljima koji se nalaze na listi branitelja osigurava ravnopravno sudjelovanje u dodjeli odbrana po službenoj dužnosti. Naime, liste branitelja se utvrđuju rješenjem koje donosi nadležni kantonalni ministar pravde u saradnji sa nadležnom advokatskom komorom za branitelje koji imaju sjedište na području odnosnog kantona. Lista se formira po abecednom redoslijedu prema prezimenu branitelja, a u konkretnom krivičnom postupku će za branitelja biti izabran naredni advokat sa liste koji do tada nije postavljen kao branitelj pred sudom pred kojim se postupak vodi. Prema tome, predloženim normativnim rješenjem isključena je proizvoljnost prilikom postavljenja branitelja po službenoj dužnosti, a Prijedlogom je propisano da će se način i postupak postavljenja branitelja dodatno bliže urediti pravilnikom kojeg donosi federalni ministar pravde.

Imajući u vidu da se radi o manje složenim i obimnim izmjenama i dopunama Zakona o krivičnom postupku Federacije Bosne i Hercegovine, predloženo je njegovo donošenje po skraćenom postupku.

III – USKLAĐENOST S EVROPSKOM PRAVNOM STEČEVINOM

Prilikom izrade ovog prijedloga, Federalno ministarstvo pravde imalo je u vidu Uredbu o Uredu Vlade Federacije BiH za zakonodavstvo i usklađenost s propisima Evropske unije („Službene novine Federacije BiH“, br. 26/20 i 76/20) i Uredbu o postupku usklađivanja zakonodavstva Federacije BiH s pravnom stečevinom Evropske unije („Službene novine Federacije BiH“, broj: 98/16) i u tom smislu je izvršilo analizu evropske pravne stečevine. Nakon detaljne i sveobuhvatne analize, zaključeno je da ne postoje primarni niti sekundarni izvori evropskog prava koji reguliraju predmetnu materiju, te obrađivač propisa nije u mogućnosti dostaviti tablicu usklađenosti za ovaj propis.

IV – OBRAZLOŽENJE POJEDINIH PRAVNIH RJEŠENJA

Članom 1. Prijedloga zakona o izmjenama i dopunama Zakona o krivičnom postupku Federacije Bosne i Hercegovine vrši se izmjena člana 21. tačka g) na način da se u istoj umjesto naziva „Državna granična služba“ uvodi naziv „Granična policija Bosne i Hercegovine“, imajući u vidu da je Državna granična služba prestala postojati, a da je pripadajuće nadležnosti preuzela Granična policija Bosne i Hercegovine.

Članom 2. Prijedloga vrši se izmjena člana 53. stav (2) ZKP FBiH u smislu da je sada propisano da se za branitelja može uzeti advokat pod uvjetima koji su propisani zakonom.

Članom 3. Prijedloga vrši se izmjena člana 57. stav (1) ZKP FBiH u smislu da se odluka o isključenju branitelja donosi na posebnom saslušanju kome prisustvuju tužitelj, osumnjičeni, odnosno optuženi, branitelj i predstavnik nadležne advokatske komore.

Članom 4. Prijedloga vrši se intervencija u član 59. stav (4) ZKP FBiH, to jest njegova izmjena u smislu da se umjesto dosadašnjeg pravila da branitelja u situacijama kada osumnjičeni, odnosno optuženi, mora imati branitelja, istog postavljaju sudija za prethodni postupak, sudija za prethodno saslušanje, sudija, odnosno predsjednik vijeća, sada branitelja u ovakvim procesnim situacijama postavlja predsjednik nadležnog suda ili osoba koju predsjednik suda za slučaj njegove spriječenosti ovlasti. Branitelji se biraju sa liste branitelja, i to po abecednom redoslijedu, na način da se za branitelja postavlja prvi naredni branitelj sa liste koji do tada nije postavljen pred tim sudom. U ovom slučaju osumnjičeni, odnosno optuženi ima pravo na branitelja do pravomoćnosti presude, a ako je izrečena kazna dugotrajnog zatvora, i u postupku po pravnom lijeku. Članom 4. Prijedloga ujedno je predložena i izmjena stava (6) člana 59. ZKP FBiH u smislu da je sada propisana obaveza federalnog ministra pravde da u roku od 30 dana od dana stupanja na snagu ovog zakona donese Pravilnik o načinu i postupku za postavljenje branitelja.

Članom 5. Prijedloga vrši se izmjena člana 59a. stav (1) ZKP FBiH, te se istim propisuje način utvrđivanja liste branitelja. Listu branitelja rješenjem utvrđuje federalni ministar pravde, odnosno nadležni kantonalni ministar pravde u saradnji s nadležnom advokatskom komorom. Kao što je ranije istaknuto, lista branitelja formira se po abecednom redoslijedu po prezimenu branitelja i može se voditi i u elektronskom obliku.

Članom 6. Prijedloga intervenira se u član 60. stav (2) ZKP FBiH kojim je uređeno postavljenje branitelja zbog slabog imovinskog stanja. Kao i u naprijed opisanoj intervenciji iz člana 4. Prijedloga kojom se vrši izmjena člana 59. stav (4) ZKP FBiH, i u kontekstu izmjene člana 60. stav (2) sada je propisano da branitelja osumnjičenom, odnosno optuženom koji je slabog imovinskog stanja postavlja predsjednik suda ili osoba koju je on za vrijeme njegove spriječenosti ovlastio, po principu abecednog redoslijeda sa liste branitelja.

Članom 7. Prijedloga vrši se dopuna ZKP FBiH sa novim članom 60a. kojim je propisano da su sudovi u Federaciji Bosne i Hercegovine dužni Federalnom ministarstvu pravde, kao i nadležnom kantonalnom ministarstvu pravde, dostaviti godišnji izvještaj o postavljenim braniteljima najkasnije do 31.03. za prethodnu godinu.

Članom 8. Prijedloga tretirana je izmjena člana 63. stav (4) ZKP FBiH kojim je uređeno razrješenje postavljenog branitelja. Naime, predloženom izmjenom određeno je da predsjednik nadležnog suda ili osoba koju on za vrijeme njegove spriječenosti ovlasti, može na traženje osumnjičenog, odnosno optuženog ili uz njegovu saglasnost, razriješiti postavljenog branitelja koji neodgovorno vrši svoju dužnost, uz dužnost suda da o razrješenju odmah obavijesti nadležnu advokatsku komoru, u kom slučaju će doći do postavljenja novog branitelja.

Članom 9. Prijedloga propisuje se dopuna ZKP FBiH sa novim članom 456a. kojim je propisano da nadzor nad primjenom odredbi člana 59. stav (4) i člana 60. stav (2) vrši Federalno ministarstvo pravde, a članom 10. Prijedloga da ovaj zakon stupa na snagu u roku od osam dana od dana objavljivanja u Službenim novinama Federacije BiH.

V – FINANSIJSKA SREDSTVA

Za provođenje ovog zakona nije potrebno osigurati dodatna sredstva u budžetu Federacije Bosne i Hercegovine.

ODREDBE ZAKONA O KRIVIČNOM POSTUPKU FEDERACIJE BOSNE I HERCEGOVINE KOJE SE MIJENJAJU I DOPUNJUJU

Član 21. Osnovni pojmovi

Osim ako ovim zakonom nije drugačije određeno, pojedini izrazi upotrijebljeni u ovom zakonu imaju sljedeće značenje:

- a) "Osumnjičeni" je osoba za koju postoji osnovana sumnja da je počinila krivično djelo,
- b) "Optuženi" je osoba protiv koje je jedna ili više tačaka u optužnici potvrđena,
- c) "Osuđeni" je osoba za koju je pravomoćnom odlukom utvrđeno da je krivično odgovorna za određeno krivično djelo,
- d) "Sudija za prethodni postupak" je sudija koji u toku istrage postupa u slučajevima kada je to propisano ovim zakonom,
- e) "Sudija za prethodno saslušanje" je sudija koji nakon podizanja optuženice postupa u slučajevima kada je to propisano ovim zakonom i koji ima ovlaštenja koja pripadaju sudiji za prethodni postupak,
- f) "Stranke" su tužitelj i osumnjičeni odnosno optuženi,
- g) "Ovlaštena službena osoba" je ona osoba koja ima odgovarajuća ovlaštenja unutar policijskih organa Bosne i Hercegovine, uključujući Državnu agenciju za istrage i zaštitu i Državnu graničnu službu, policijskih organa nadležnih ministarstava unutrašnjih poslova u Federaciji, sudske i finansijske policije, kao i carinskih organa, poreskih organa i organa vojne policije Bosne i Hercegovine ili u Federaciji Bosne i Hercegovine. Pod ovlaštenim službenim osobama smatraju se i stručni saradnici, odnosno istražitelji tužiteljstva koji rade po ovlaštenjima tužitelja,
- h) "Oštećeni" je osoba kojoj je osobno ili imovinsko pravo krivičnim djelom povrijeđeno ili ugroženo,
- i) "Pravne osobe" su osobe koje su kao takve definirane u KZ FBiH, uključujući: korporacije, preduzeća, udruženja i ortakluka i druge pravne osobe,
- j) "Istraga" obuhvata aktivnosti poduzete od tužitelja ili ovlaštene službene osobe, u skladu s ovim zakonom, uključujući prikupljanje i čuvanje izjava i dokaza,
- k) "Unakrsno ispitivanje" je ispitivanje svjedoka i vještaka od stranke odnosno branitelja, koja nije pozvala svjedoka odnosno vještaka,
- l) "Izravno ispitivanje" je ispitivanje svjedoka i vještaka od stranke odnosno branitelja, koja je pozvala svjedoka odnosno vještaka,
- m) "Osnovana sumnja" je viši stepen sumnje zasnovan na prikupljenim dokazima koji upućuju na zaključak da je izvršeno krivično djelo,
- n) "Zabilješke" i "spisi" su slova, riječi ili brojke ili njihov ekvivalent, zapisane rukopisom, odštampane pisaćom mašinom, odštampane, fotokopirane, fotografirane, zabilježene magnetskim impulsima, mehanički ili elektronski ili nekim drugim oblikom sakupljanja podataka,
- o) "Fotografije" su fotografske, digitalne i rendgenske snimke, video trake i filmovi,
- p) "Original" je sam spis ili snimka ili sličan ekvivalent kojim se ostvaruje isto djelovanje od osobe koja ga piše, snima ili izdaje. "Original" fotografija uključuje negativ i sve kopije. Ako su podaci pohranjeni u kompjuteru ili sličnom uređaju za automatsku

obradu podataka, original je i svaki odštampani primjerak ili okom vidljivi pohranjeni podatak,

- r) "Kopija" je preslikavanje originala ili matrice, uključujući uvećanja i umanjenja, mehaničkim ili elektronskim presnimavanjem, hemijskom reprodukcijom ili nekom drugom ekvivalentnom tehnikom kojom se precizno reprodukuje original,
- s) "Telekomunikacijska adresa" je svaki telefonski broj, linijski ili mobilni ili elektronske pošte ili internet adresa koju posjeduje ili koristi određena osoba,
- t) "Bračni ili vanbračni drug" su one osobe koje takav status imaju prema porodičnom pravu,
- u) "Kompjuterski sistem" je svaka naprava ili skupina međusobno spojenih ili povezanih naprava, od kojih jedna ili više njih na osnovu programa automatski obrađuje podatke,
- v) "Kompjuterski podaci" označavaju svako iskazivanje činjenica, informacija ili koncepata u obliku prikladnom za obradu u kompjuterskom sistemu, uključujući i program koji je u stanju prouzrokovati da kompjuterski sistem izvrši određenu funkciju.

Član 53.

Pravo na branitelja

- (1) Osumnjičeni odnosno optuženi može imati branitelja u toku cijelog postupka.
- (2) Za branitelja se može uzeti advokat pod uvjetima koji su propisani Zakonom o advokaturi Federacije Bosne i Hercegovine, pravni zastupnici kantonalnih, kao i federalnih institucija (zavoda/ureda za pravnu pomoć), koji imaju položen pravosudni ispit i najmanje tri godine radnoga iskustva na pravnim poslovima.
- (3) Ukoliko osumnjičeni, odnosno optuženi sam ne uzme branitelja, osumnjičenom, odnosno optuženom, osim ako se on tome izričito ne protivi, mogu branitelja uzeti njegov zakonski zastupnik, bračni odnosno vanbračni drug, krvni srodnik u pravoj liniji do bilo kog stepena, usvojitelj, usvojenik, brat, sestra ili hranitelj.
- (4) Branitelj mora predati punomoć za zastupanje prilikom preduzimanja prve radnje u postupku.

Član 57.

Postupak isključenja branitelja

- (1) Odluka o isključenju branitelja donosi se na posebnom ispitivanju kome prisustvuju tužitelj, osumnjičeni odnosno optuženi, branitelj i predstavnik advokatske komore čiji je branitelj član, odnosno pravni zastupnici kantonalnih, kao i federalnih institucija (zavodi/uredi za pravnu pomoć), čiji je branitelj zaposlenik.
- (2) Postupak isključenja se može provesti i bez branitelja ako je uredno pozvan i ako je u pozivu za ispitivanje bio upozoren da će se postupak voditi i u njegovoj odsutnosti. O ispitivanju se sastavlja zapisnik.

Član 59.

Kada osumnjičeni odnosno optuženi mora imati branitelja

- (1) Osumnjičeni mora imati branitelja već pri prvom ispitivanju ako je nijem ili gluh ili ako je osumnjičen za krivično djelo za koje se može izreći kazna dugotrajnog zatvora.
- (2) Osumnjičeni odnosno optuženi mora imati branitelja prilikom izjašnjenja o prijedlogu za određivanje pritvora, za vrijeme dok pritvor traje.
- (3) Nakon podizanja optužnice za krivično djelo za koje se može izreći deset godina zatvora ili teža kazna, optuženi mora imati branitelja u vrijeme dostavljanja optužnice.
- (4) Ako osumnjičeni odnosno optuženi u slučajevima obavezne odbrane ne uzme sam branitelja, ili branitelja ne angažuju osobe iz člana 53. stav 3. ovog zakona, branitelja će mu postaviti sudija za prethodni postupak, sudija za prethodno saslušanje, sudija odnosno predsjednik vijeća. U ovome slučaju, osumnjičeni odnosno optuženi ima pravo na branitelja do pravomoćnosti presude, a ako je izrečena kazna dugotrajnog zatvora – i u postupku po pravnom lijeku.
- (5) Branitelj će biti postavljen osumnjičenom odnosno optuženom ako sud utvrdi da je zbog složenosti predmeta, duševnog stanja osumnjičenog odnosno optuženog ili drugih okolnosti u interesu pravičnosti.
- (6) U slučaju postavljanja branitelja, osumnjičeni odnosno optuženi će se prvo pozvati da sam izabere branitelja s predložene liste. Ukoliko osumnjičeni odnosno optuženi sam ne izabere branitelja s predložene liste, branitelja će postaviti sud.

Član 59a.

- (1) Listu branitelja rješenjem utvrđuje nadležni ministar pravde, u saradnji s nadležnom advokatskom komorom i institucijama sui generis (zavodi/uredi za pravnu pomoć).
- (2) Lista branitelja dostavlja se svim sudovima, nadležnome tužiteljstvu, te ministarstvu unutrašnjih poslova.

Član 60.

Postavljanje branitelja zbog slabog imovnog stanja

- (1) Kada ne postoje uvjeti za obaveznu odbranu, a postupak se vodi za krivično djelo za koje se može izreći kazna zatvora tri godine ili teža kazna, ili kada to zahtijevaju interesi pravičnosti bez obzira na propisanu kaznu, osumnjičenom odnosno optuženom će se, na njegov zahtjev, postaviti branitelj, ako zbog svojeg imovnog stanja ne može snositi troškove odbrane.
- (2) Zahtjev za postavljanje branitelja iz stava 1. ovog člana može se podnijeti u toku cijeloga krivičnog postupka. Branitelja postavlja sudija za prethodni postupak, sudija za prethodno saslušanje, sudija odnosno predsjednik vijeća nakon što je osumnjičenom odnosno optuženom prvo pružena prilika da s predložene liste izabere branitelja.

- (3) Zahtjev za postavljanje branitelja radi slabog imovnog stanja evidentira se u spisu. Sud će na temelju utvrđenog imovnog stanja osumnjičenom odnosno optuženom donijeti odluku o zahtjevu bez odlaganja.

Član 63.

Razrješenje postavljenog branitelja

- (1) Umjesto postavljenog branitelja, osumnjičeni odnosno optuženi može sam uzeti drugog branitelja. U tom će se slučaju postavljeni branitelj razriješiti.
- (2) Branitelj može tražiti da bude razriješen samo na način propisan zakonom.
- (3) O razrješenju branitelja u slučaju iz st. 1. i 2. ovog člana odlučuje u toku istrage sudija za prethodni postupak, nakon podizanja optužnice - sudija za prethodno saslušanje, a u toku glavne rasprave sudija odnosno vijeće. Protiv ove odluke žalba nije dopuštena.
- (4) Sudija za prethodni postupak, sudija za prethodno saslušanje, sudija odnosno vijeće može, na zahtjev osumnjičenog odnosno optuženog ili uz njegovu saglasnost razriješiti postavljenog branitelja koji neodgovorno obavlja svoju dužnost. Umjesto razriješenog branitelja postaviti će se drugi branitelj. O razrješenju branitelja odmah će se obavijestiti advokatska komora čiji je član.